

Jarraporto de la Nov-Zelanda Esperanto-Asocio (NZEa) por 2008

Estraro de NZEA

La jenaj anoj de la Estraro elektiĝis dum la jarkunveno kiu okazis en Auckland la 20-an de januaro de 2008, kaj daŭris kiel estraranoj dum la tuta jaro.

Prezidanto	David Ryan
Vic-Prezidanto	Chris Krägeloh
Kasisto	Don Rogers
Sekretario	Bradley McDonald
Helpsekretario	Howard Gravatt
Estrarano	Erin McGifford

La Estraro kromelektis Howard Gravatt kiel estraranon (Help-Sekretarion) en junio de 2008. Howard jam antaŭe estis estrarano dum multaj jaroj.

Estraranoj loĝis en diversaj partoj de Nov-Zelando kaj, pro tio, ili povis raporti kaj priparoli aferojn kun klubanoj en Auckland, Wellington, kaj Christchurch.

Dum la tuta jaro la posteno de unu estrarano vakis. Ne troveblis persono por tiu posteno.

Kunvenoj de la Estraro

La Estraro kunvenis ses foje dum la jaro, kvar foje telefone kaj du foje per interreta Skype-metodo.

Membraro de NZEA

Je la fino de la financa jaro (30 de septembro de 2008) NZEA havis 37 membrojn, kompare kun 41 samtempe en 2007, pro la fakto ke ses membroj en 2007 ne remembris. Tamen, kvin novaj personoj membriĝis. Kvankam novaj membroj ne multis, la aliĝo de iu ajn nova membro estis ĝojinda fakto, tamen, pro la manko da novaj membroj en antaŭaj jaroj. Naŭ aliaj personoj membriĝis ekde la fino de nia financa jaro ĝis la fino de decembro 2008, parte pro la fakto ke NZEA ofertas senpagan gazeton al novaj Esperantistoj kiuj unuan fojon membriĝas en NZEA dum 2008/09.

Kluboj aktivis dum la jaro en Auckland, Masterton, Wellington, kaj Christchurch.

Dum la Oceania Kongreso en januaro 2008, Jackie Fox iĝis dumviva membro de NZEA, laŭ decido de la Estraro, pro 18-jara kontribuo al NZEA, plejparte kiel kasistino.

Estis malĝoje por ni aŭdi pri la morto de dumvivaj membroj, Betty Wyatt kaj Beryl Evans. Lucia Bruce, membro de la Christchurch Esperanto-Societo, ankaŭ forpasis dum la jaro.

Komunikado kaj propagandado

Retpaĝo de NZEA

Don Rogers daŭre ĝisdatigis la retpaĝon de NZEA (www.esperanto.org.nz) kaj ankaŭ renovigis la aspekton de la paĝo. Nia retpaĝo estas grava komunikilo kaj ni ofte ricevas informpetojn per la retadreso kiu aperas sur la retpaĝo.

Arĝenta Filiko

Arĝenta Filiko, kiun redaktis Chris Krägeloh, eldoniĝis dufoje dum la jaro. *Arĝenta Filiko* estas alt-kvalita eldono kaj grava komikilo al niaj membroj, krom la pli ĝeneralaj artikoloj en *Esperanto sub la Suda Kruco*.

Esperanto sub la Suda Kruco (ESK)

ESK dissendiĝis al membroj de NZEA kaj Aŭstralia Esperanto-Asocio (AEA). En frua 2008 Chris Krägeloh el Auckland kaj Ŝandor Monostori el Aŭstralio transprenis kunredaktan taskon kaj enkondukis grandajn ŝanĝojn al la aspekto al *ESK*. Kun tiu nova aspekto, *ESK* estas tre okulfrapa kaj leginda gazeto kaj taŭga por sendi al kiuj petas informojn pri Esperanto. NZEA aĉetis iMac-komputilon por Chris por redakti la revuon.

Eroj en televido

Du-minuta ero pri la Oceania Kongreso aperis dum la unua tago de la kongreso en la ĉefa novaĵprogramo de TVNZ je la 6-a ptm. Ĉi tiu artikolo estis tre favora pri Esperanto kaj plej verŝajne kelkaj centmiloj da nov-zelandanoj vidis la eron.

Bradley McDonald kaj Chris Krägeloh estis intervjuitaj du foje en alia televida programo de ALT TV en aprilo kaj majo de 2008.

Leteroj al la redaktoro

Letero verkita per la Prezidanto aperis en la *Dominion Post* de Wellington la 7-an de januaro de 2008. Alia letero verkita de kimra Esperantisto aperis en la sama tagĵurnalo la 28-an de junio de 2008. La Prezidanto sendis leteron por subteni tiun kimran sed ĝi ne estis presita.

Reklamado en gazeto de Grey Power

La Estraro decidis aperigi kvar reklamojn en nacia gazeto de Grey Power (asocio por maljunuloj). Ni konsideris ke, kvankam Esperanto celas al ĉiuj, plej verŝajne maljunuloj estos pli pretaj por lerni Esperanton ĉar ili eble serĉas novan intereson, ili ĝenerale havas pli da libera tempo, kaj ili eble aŭdis pri Esperanto aŭ eĉ lernis ĝin en lernejo antaŭ jardekoj.

Tri reklamoj aperies ĝis la fino de 2008 kaj proksimume 30 personoj petis informojn al NZEA (per nia senpaga telefonnumero, retpoŝto, aŭ normala poŝto).

Afiŝoj

AEA preparis kelkajn tre belajn kaj okulfrapajn afiŝojn kiujn NZEA disdonis en bibliotekoj en Auckland kaj en la universitato Victoria de Wellington.

0800 senpaga telefonnumero kaj retadreso

Nia senpaga 0800 numero (kiu aperas en nia retpaĝo) daŭre ekredirektiĝis al la domo de la Prezidanto. Samtempe, nia retadreso nzea@esperanto.org.nz daŭre vojigis mesaĝojn al la Prezidanto kaj Kasisto. Ĉi tiuj du komunikaj metodoj estas utilaj por ne-membroj kaj aliaj personoj kiuj interesiĝas pri Esperanto kaj dum la jaro ni ricevis diversajn informpetojn, ekzemple :

- petoj pri membreco en Esperanto kaj pri rimedoj por lerni Esperanton
- peto de lernejanino en Whangaparaoa (apud Auckland) kiu volas starigi E-klubon en la lernejo
- petoj pri kontaktdetaloj de kluboj en Nov-Zelando de eksterlandaj Esperantistoj kiuj intencas viziti.

Rimedo por lerni Esperanton

NZEA aĉetis pliajn ekzemplerojn de *Poŝamiko* kaj ekzemplerojn de la libro *Esperanto by Direct Method* de Stano Marček. Al kiuj petis informojn (responde al la reklamo en la gazeto de Grey Power aŭ ĝeneralaj informpetoj) NZEA sendis ekzemplerojn de tiuj du libroj, membraliĝilon, ekzemplerojn de *Esperanto sub la Suda Kruco*, *Arĝenta Filiko* kaj aliaj gazetoj, korespondan kurson de AEA (kun kontaktdetaloj por Nov-Zelando), kaj novan du-paĝan broŝuron ‘Getting Started in Esperanto’ (‘Kiel uzi Esperanton’).

Financaj aferoj

En oktobro de 2007, NZEA sendis peton al la Charities Commission (Instanco pri Bonfaraj Asocioj) por ke NZEA daŭre estu rekonata kiel bonfara asocio laŭ la nova leĝo Charities Act 2005. La Instanco finfine informis nin pri la sukceso de nia peto en junio de 2008. Pro tio, NZEA daŭros kiel bonfara asocio kaj ne devos pagi impostojn sur siaj enspezoj.

Dum la jaro, ni reinvestis nian monon je ĝenerale pli altaj interezoj kaj ĉe diversaj financaj kompanioj, por ne riski troan monon ĉe sama kompanio. Tamen, intertempe interezoj malaltiĝas, kio plej verŝajne influos nian enspezon por la 2008/09-a financa jaro. Bonvole vidu la apartan raporton de la kasisto.

Oceania Kongreso de 2008

La plej granda sukceso dum la jaro estis la Oceania Kongreso ekde la 14-a ĝis la 23-a de januaro de 2008. Entute 59 personoj partoprenis el Nov-Zelando, Aŭstralio, Japanio, Slovakio, Italio, Francio, Svedio, Malajzio, kaj Nov-Kaledonio.

Surloke en Auckland, la LKK laboris bonege pri la programo, kongresejaj aferoj, kaj ekskursoj kaj eĉ preparis specialajn eldonojn de la *Argenta Filiko*. Eĉ la vetero estis varma kaj sunplena dum preskaŭ la tuta kongreso.

La Oceania Kongreso estis sukceso ĉar ekis propagando por ni en la televido (vidu supre) kaj novaj kaj jam spertaj Esperantistoj en Nov-Zelando uzis la okazon por plibonigi sian scion de Esperanto per kursoj je tri niveloj kaj, plej grave, parolante kun eksterlandaj vizitantoj.

Somera kurso en Aŭstralio

La Estraro decidis ne okazigi kongreson en Nov-Zelando en 2009, prefere por subteni la someran kurson de AEA en Sydney en januaro de 2009. Je ĉi tiu momento, ŝajnas ke sufiĉe multaj membroj de NZEA ĉeestos por havi kvorumon por nia jarkunveno en 2009.

UNANZ

NZEA realiĝis en UNANZ (Asocio de la Unuiĝintaj Nacioj de Nov-Zelando). Bradley McDonald ĉeestis nacian kongreson de UNANZ en Auckland en majo de 2008 kaj disdonis informbroŝurojn. Bradley elektiĝis al la Nacia Estraro de UNANZ kiel reprezentanto de aliĝita membro.